



9 Jun 2009 (Selasa)

Projek mega harus lalui proses prakelayakan tender

KUALA TERENGGANU 9 Jun - Semua projek mega mesti melalui proses prakelayakan tender bagi memastikan hanya mereka yang berkemampuan dari segi kewangan dan kepakaran terpilih. Yang Dipertua Dewan Perniagaan Melayu Malaysia Negeri Terengganu (DPMMT), Datuk Ir. Tengku Ismail Tengku Jaafar berkata, ini bermakna, hanya tawaran yang betul-betul berdasarkan keupayaan sahaja yang perlu diteliti dan diterima. Beliau berkata, untuk menjamin komitmen dan tanggungjawab penender selepas penyiapan projek, mereka perlu menyediakan bon jaminan selain menempatkan pasukan pakar untuk memantau kerja-kerja yang telah dilaksanakan. Menurutnya, proses prakelayakan penender perlu walaupun penender terbabit berdaftar dengan agensi kerajaan. "Ini adalah saranan kami dan ia bukan bertujuan mempertikaikan kewibawaan mana-mana pihak," katanya kepada *Utusan Malaysia* di sini hari ini.

Beliau mengulas tragedi bumbung Stadium Sultan Mizan Zainal Abidin, Kompleks Sukan Negeri di Gong Badak di sini yang digunakan untuk Sukan Malaysia (Sukma) 2008 runtuh baru-baru ini. Runtuhan berlaku membabitkan bumbung di bahagian timur stadium bernilai RM292 juta itu yang menempatkan pintu masuk utama, pintu A, B dan B1 ke tempat duduk awam serta bumbung tempat duduk tetamu diraja serta orang kenamaan. Mengenai tragedi di stadium tersebut, Tengku Ismail berkata, memandangkan projek itu bersaiz besar, kejadian yang berlaku seharusnya diteliti dan dikaji dari beberapa sudut. Katanya, oleh kerana reka bentuk pembinaan membabitkan pakar dan teknologi yang sofistikated, kajian seharusnya dijalankan oleh pakar untuk menjelaskan punca sebenar ia berlaku. "Tidak ada gunanya kita membuat pelbagai andaian tentang punca kejadian sekiranya kita tidak mempunyai kepakaran dalam bidang berkaitan. "Malah ia mungkin boleh menambah kekeliruan rakyat dan memberi persepsi yang berbeza serta membawa tanggapan negatif terhadap pihak terbabit seolah-olah mereka menerima hukuman sebelum penemuan kajian dibuat," katanya.

10 Jun 2009 (Rabu)

Isu nilai tanah projek PKFZ antara penjelasan dituntut PAC

KUALA LUMPUR 10 Jun — Jawatankuasa Kira-Kira Wang Negara (PAC) hari ini meneruskan siasatan berhubung skandal Projek Zon Pelabuhan Bebas Pelabuhan Klang (PKFZ) dengan menuntut penjelasan daripada Lembaga Pelabuhan Klang (PKA), operator bagi projek berkenaan, bagi beberapa isu berbangkit. Timbalan Penggerusi PAC Dr Tan Seng

Giaw berkata PAC menetapkan dua hari untuk mendengar penjelasan dari PKA, termasuk kontroversi membabitkan kos tanah projek mega itu. "Kita juga minta PKA beritahu siapakah yang membuat keputusan untuk tidak menghiraukan cadangan Peguam Negara yang mengatakan bahawa tanah di Pulau Indah itu perlu diambil alih oleh kerajaan.

"Kerana sebelum ambil alih tanah, kerajaan akan guna Akta Pengambilalihan Tanah di bawah Seksyen 4 yang mengatakan bahawa (harga) tanah tidak boleh dispekulasi. Jadi kita hendak tahu siapa yang membuat keputusan itu untuk tidak guna Seksyen 4 (Akta Pengambilalihan Tanah)," katanya ketika ditemui pemberita di lobi Parlimen, di sini, hari ini. - Bernama

10 Jun 2009 (Rabu)

Badan penyiasat bumbung stadium runtuh ditubuh

KUALA TERENGGANU 10 Jun - Hanya sebuah badan penyiasat khas ditubuhkan bagi menyiasat punca kejadian runtuhan separuh daripada bumbung Stadium Sultan Mizan Zainal Abidin, Kompleks Sukan Negeri di Gong Badak di sini yang mengakibatkan kerugian kira-kira RM25 juta. Menteri Besar, Datuk Ahmad Said berkata, anggota penyiasat itu dianggotai oleh pelbagai pihak termasuk pensyarah universiti. Katanya, badan penyiasat itu dilantik untuk menilai dan mencari punca mengapa bumbung sepanjang kira-kira 400 meter di bahagian timur stadium itu boleh runtuh.

Menurutnya, pemeriksaan ke atas Stadium Tertutup di kompleks sukan berkenaan turut akan dilakukan bagi memastikan kekukuhannya. "Apa-apa keputusan lanjut akan diketahui selepas ini dan kerajaan negeri diminta agar menubuhkan sebuah sahaja badan siasatan mengenainya untuk mengelakkan kekeliruan," katanya selepas menghadiri majlis makan tengah hari bersama Firefly di Primula Beach Resort di sini hari ini.

Hadir sama Pengerusi Jawatankuasa Pelancongan, Kebudayaan, Kesenian dan Warisan Negeri, Datuk Zaabar Mohd. Adib dan Pengarah Urusan Firefly, Eddy Leong. Baru-baru ini bumbung bahagian timur stadium yang menempatkan pintu A, B dan B1 ke tempat duduk awam serta tempat duduk tetamu diraja serta orang kenamaan runtuh. Stadium Sultan Mizan Zainal Abidin adalah di bawah penyeliaan kerajaan Terengganu dan Kementerian Belia dan Sukan hanya mengawal selia empat buah kompleks sukan serta 10 buah stadium di seluruh negara.

10 Jun 2009 (Rabu)

Kementerian cari penyelesaian, sebelum guna KIBT

BUKIT KAYU HITAM 10 Jun - Kementerian Pertanian dan Industri Asas Tani akan mencari penyelesaian segera terhadap masalah yang dibangkitkan oleh para pengimport ikan sebelum menguatkuaskan penggunaan Kotak Ikan Berinsulasi Tinggi (KIBT) yang tertangguh sejak tiga tahun lalu. Menterinya, Datuk Noh Omar berkata, hasil maklum balas selepas mengadakan sesi dialog dengan pengimport ikan, kementeriannya mendapati harga KIBT yang lebih mahal dan kualiti rendah menjadi punca mereka enggan menggunakan.

Selain itu, katanya, tiada dana mencukupi dan kos pengendalian memunggah KIBT yang meningkat lebih sekali ganda turut menjadi faktor pengimport ikan enggan menukar kepada kotak ikan terbaru yang diperkenalkan oleh Lembaga Kemajuan Ikan Malaysia (LKIM) itu. "Saya yakin semua masalah ini akan dapat diatasi. Tetapi apabila kita menyelesaikan semua masalah ini, arahan penggunaannya akan dikuatkuaskan serta merta. "Saya berharap pengimport ikan tidak akan menimbulkan masalah selepas itu kerana mereka tiada alasan lagi untuk berbuat demikian," katanya kepada pemberita selepas Majlis Ramah Mesra Bersama Pengimport dan Ejen Pengangkutan Ikan di kompleks LKIM di sini semalam.

Noh menegaskan, selepas arahan penggunaan KIBT diwajibkan, kerajaan tidak akan berkompromi mengenai isu itu yang berlarutan selama tiga tahun selepas ia diwartakan pada September 2006. Katanya, kerajaan tidak akan tunduk kepada kehendak atau selera pengimport ikan kerana telah memberi peluang dan membantu mereka daripada segenap sudut berhubung penggunaan kotak ikan yang bertujuan menjaga kualiti ikan. Menurutnya, para nelayan tempatan juga tidak perlu bimbang mengenai arahan penggunaan KIBT kerana ia hanya dikuatkuaskan kepada pengimport dan tidak diwajibkan dalam proses pengedaran ikan-ikan tempatan. Dalam pada itu, Noh turut melahirkan rasa hairan dengan sesetengah pengimport ikan yang akur untuk mengikuti peraturan negara lain tetapi tidak di negara sendiri.

Beliau memberikan contoh yang mana ikan yang ingin dieksport ke Singapura perlu menggunakan KIBT dan di Thailand juga memakai kotak tersebut, tetapi apabila masuk ke negara ini hanya menggunakan tong ikan biasa. "Kita rasa malu sebagai rakyat Malaysia yang ada peraturan sendiri kita tak boleh ikut, tetapi apabila nak masuk ke negara orang, tahu pula ikut peraturan," katanya.

10 Jun 2009 (Rabu)

PKFZ: Pasukan khas diberi tempoh 2 bulan kemuka cadangan

PUTRAJAYA 10 Jun - Sebuah pasukan khas dan dua jawatankuasa yang baru dibentuk diberi tempoh dua bulan untuk mengemukakan cadangan terhadap projek Zon Bebas Pelabuhan Klang (PKFZ) dan syarikat PKFZ Sdn. Bhd berdasarkan laporan audit PricewaterhouseCoopers Advisory Services Sdn. Bhd. (PwC). Menteri Pengangkutan, Datuk

Seri Ong Tee Keat berkata, pasukan khas dan jawatankuasa itu dianggotai oleh pihak luar yang berwibawa serta mampu memberikan komitmen, selain bertindak secara telus. Katanya, mereka perlu menyediakan analisis terperinci dan kajian berdasarkan skop kepakaran masing-masing untuk menyediakan cadangan sewajarnya kepada pihak Berkuasa Pelabuhan Klang (PKA).

"Tindakan susulan akan diambil oleh kerajaan selepas cadangan diterima," katanya kepada pemberita di sini hari ini. Ketika mengumumkan barisan pasukan khas itu, Tee Keat berkata, ia dianggotai peguam, akauntan dan perunding penilaian juruukur bangunan daripada firma yang memiliki kepakaran dalam profesion masing-masing. Menurutnya, PKA telah melantik peguam terkenal, Vinayak Pradhan untuk mengetuai pasukan itu dengan dibantu oleh rakan kongsinya, Lim Chee Wee. Jelas beliau, dua wakil dari PWC iaitu Chin Kwai Fatt dan Lim San Peen akan turut menganggotai pasukan itu bagi membantu dari sudut perundangan dan penstrukturran kewangan.

Mengulas mengenai PKA, Tee Keat memberitahu, beliau turut membentuk jawatankuasa ad hoc yang diketuai Presiden Transparency Malaysia, Datuk Paul Low Seng Kuan. Seorang lagi anggota jawatankuasa *ad hoc* itu ialah Presiden Institut Akauntan Malaysia, Nik Mohd. Hasyudeen Yusoff. Pasukan tersebut akan terus membantu kerajaan dalam memastikan lembaga dan pengurusan PKA mematuhi prosedur ditetapkan kerajaan. Dalam pada itu, katanya, pembangunan projek PKFZ akan dipantau oleh kerajaan bagi memastikan kosnya munasabah dan telus.

Tee Keat berkata, Exco jawatankuasa PKFZ Sdn. Bhd. dianggotai Pengurusnya, Datuk Lee Hwa Beng, Presiden Chartered Institute of Marketing Malaysia, Tan Sri Prof. Dr. James Alfred A. David dan Ketua Pengarah Institut Pembangunan Industri Malaysia, Datuk Jalilah Baba. Turut menganggotainya ialah Pengurus Persatuan Pemaju Perumahan dan Hartanah (REHDA), Datuk Micheal Yam; Pengurus HRSC System & Consulting Sdn. Bhd, Datuk Mohamad Haslah Mohamad Amin dan peguam cara Tan Foong Luen. Dalam pada itu, orang ramai yang ingin mengikuti perkembangan PKFZ boleh melayari laman web www.pkfznews.com.my yang dilancarkan hari ini.

11 Jun 2009 (Khamis)

Sijil ISO syarat projek pembinaan kelas A

Oleh AIZAWATI AHMAD dan ASLIZA MUSA pengarang@utusan.com.my

KUALA LUMPUR 11 Jun - Projek pembinaan kelas A akan diberikan kepada kontraktor yang memiliki sijil Pertubuhan Piawaian Antarabangsa (ISO) bertujuan menambah baik kualiti binaan di negara ini. Menteri Kerja Raya, Datuk Shaziman Abu Mansor berkata, langkah tersebut terpaksa diambil kerana beberapa kejadian bangunan runtuh seperti di Terengganu dan Petaling Jaya baru-baru ini mampu menjelaskan keyakinan pihak luar

terhadap kemampuan kontraktor tempatan. Beliau berkata, jika sebelum ini, negara-negara luar seperti India, Libya, Qatar dan negara di Asia Barat percaya kepada kemampuan syarikat pembinaan Malaysia tetapi kini ia mampu menjelaskan peluang tersebut. "Sebab itu kita dan CIDB (Lembaga Pembangunan Industri Pembinaan Malaysia) berusaha untuk meningkatkan integriti di kalangan kontraktor tempatan agar mereka bertanggungjawab terhadap bangunan yang mereka bina," katanya.

Beliau berkata demikian kepada pemberita selepas merasmikan Seminar Integriti Industri Pembinaan 2009 anjuran Lembaga Pembangunan Industri Pembinaan Malaysia (CIDB) di sini hari ini. Menurut Shaziman, pihaknya akan mengemukakan cadangan itu kepada kerajaan agar ia dapat dilaksanakan dalam Rancangan Malaysia Ke-10 (RMK10). "Kalau selepas ini untuk RMK10, jika syarikat itu kita minta adakan ISO dan dia tidak mampu adakan, kita cadangkan syarikat-syarikat ini tidak layak untuk dapat projek. "Kita tidak mahu insiden-insiden sebelum ini berulang dalam negara kita kerana ia bukan sahaja jadi perdebatan umum tetapi juga menjelaskan kredibiliti kita," tegasnya.

Shaziman berkata, pihaknya juga akan melakukan kerja-kerja pembersihan iaitu menyingkirkan kontraktor-kontraktor yang tidak aktif. "Untuk melaksanakan tugas ini, bersama-sama Jabatan Kerja Raya (JKR), Pusat Khidmat Kontraktor (PKK) dan juga persatuan-persatuan kontraktor, kita akan kenal pasti syarikat-syarikat yang patut dikeluarkan daripada senarai," ujarnya.

Mengenai keperluan tenaga kerja, beliau memberitahu, CIDB meletakkan sasaran untuk melahirkan 100,000 orang tenaga kerja tempatan yang berkemahiran dalam bidang pembinaan tahun ini. Katanya, setakat ini, CIDB mempunyai 40,000 pelatih dan pihaknya yakin ia mampu mengurangkan kebergantungan negara kepada tenaga kerja asing yang kini mencecah 300,000 orang. Mengulas perkembangan siasatan bumbung Stadium Sultan Mizan Zainal Abidin yang runtuh, Shaziman memberitahu, jawatankuasa yang menyiasat, bebas melantik pakar perunding untuk membantu mereka menyiapkan laporan lengkap sebelum dibentangkan kepada kerajaan. Katanya, jawatankuasa itu yang terdiri daripada kumpulan profesional diberi tempoh sebulan sebelum mengemukakan hasil siasatan kepadanya. Mengenai penahanan beberapa individu berhubung kes keretakan Lebuh Raya Lingkaran Tengah 2 (MRR2) oleh Suruhanjaya Pencegahan Rasuah Malaysia (SPRM), Shaziman berkata, kes itu bukan lagi di bawah bidang kuasanya dan terserah kepada agensi terlibat untuk mengambil tindakan susulan.

11 Jun 2009 (Khamis)

KPDNHEP kini dikenali KPDNKK

KUANTAN 11 Jun - Sektor koperasi negara diletakkan di bawah Kementerian Perdagangan Dalam Negeri dan Hal Ehwal Pengguna (KPDNHEP) selepas Kementerian Pembangunan Usahawan dan Koperasi (MeCD) dimansuhkan pada Mac lalu. Berikutan itu, KPDNHEP kini dikenali sebagai Kementerian Perdagangan Dalam Negeri, Koperasi dan Kepenggunaan

(KPDNKK) berkuat kuasa serta-merta. Nama baru itu diumumkan oleh Menterinya, Datuk Seri Ismail Sabri Yaakob di Jabatan Penyiaran Pahang di sini hari ini.

Ismail Sabri berkata, nama baru kementeriannya dipersetujui Perdana Menteri, Datuk Seri Najib Tun Razak pada mesyuarat Kabinet semalam. Dengan keputusan itu, kata beliau, beberapa penstrukturran termasuk penggunaan logo baru akan diperkenalkan oleh KPDNKK. "Meskipun kita telah menggunakan nama baru tetapi perubahan-perubahan akan diperkenalkan secara berperingkat-peringkat. "Kita juga mungkin akan mengadakan pertandingan mencipta logo untuk nama baru kementerian ini," katanya kepada pemberita selepas merasmikan Koperasi Bela Rakyat (Kobera) di Jabatan Penyiaran Pahang hari ini.

Ismail Sabri memberitahu, selepas MeCD dimansuhkan, kedudukan sektor koperasi sememangnya diletakkan di bawah KPDNHEP tetapi statusnya kurang jelas. "Sehubungan itu, Kabinet bersetuju meletakkan nama koperasi sejajar dengan perubahan nama KPDNHEP itu," katanya.

Mengulas peranan Kobera, beliau menjelaskan, pihaknya memperuntukkan geran sebanyak RM30,000 kepada setiap koperasi yang merancang untuk menjalankan perniagaan. "Bagaimanapun, geran itu hanya akan disalurkan selepas Kobera mengemukakan pelan cadangan dan kertas kerja perniagaan yang hendak dijalankan. "Setakat ini, hanya 32 daripada 111 Kobera berdaftar di seluruh negara memperoleh geran tersebut.". Bagi memastikan Kobera beroperasi secara profesional, jelas beliau, Suruhanjaya Koperasi Malaysia (SKM) akan menggaji seorang pengurus untuk menguruskan perniagaan koperasi terbabit bagi tempoh enam bulan.

11 Jun 2009 (Khamis)

Paip di Kompleks Pentadbiran Kerajaan Persekutuan Sabah bocor

KOTA KINABALU 11 Jun - Belum pun siap kerja-kerja membaiki kerosakan dinding Kompleks Pentadbiran Kerajaan Persekutuan Sabah di Likas, dekat sini, bangunan bernilai RM360 juta itu hari ini sekali lagi dilanda masalah baru. Masalah baru itu adalah kebocoran paip air yang dikesan pada pukul 6.30 pagi di blok A, tingkat tujuh, melibatkan Unit Pendidikan Masyarakat, Suruhanjaya Pencegahan Rasuah Malaysia (SPRM) Sabah. Kebocoran salah satu paip utama yang berkedudukan di atas siling unit itu menyebabkan beberapa keping siling runtuh dan peralatan pejabat seperti komputer, fail dan mesin faks rosak. Tinjauan *Utusan Malaysia* ke unit tersebut mendapati, semua lif di blok tersebut masih dihujani air dan lantai serta karpet digenangi air termasuk beberapa pejabat lain di tingkat bawah. Keadaan tersebut menimbulkan ketidakselesaan kepada penjawat awam yang mana blok itu turut menempatkan Ibu Pejabat SPM, Pejabat Jabatan Pendaftaran Negara (JPN) dan beberapa agensi kerajaan lain. Setiausaha Persekutuan Sabah, Datuk Ismail Wadin berkata, kerja-kerja membaiki kerosakan paip dan bangunan sedang giat dilakukan dan dijangka siap dalam masa terdekat.

Kerosakan tersebut, katanya, tidak menjelaskan pentadbiran pejabat-pejabat Persekutuan dan pihaknya masih menyiasat keseluruhan jumlah kerugian. "Masalah ini kecil sahaja dan tidak sehingga melumpuhkan pentadbiran di sini. Tidak semua bangunan di blok A dimasuki air," katanya ketika ditemui di sini.

Kompleks itu yang terletak di Jalan Universiti turut dikenali sebagai mini Putrajaya dan beroperasi sepenuhnya pada awal 2006 melalui tiga buah bangunan utama iaitu blok A,B dan C. Bagaimanapun tidak sampai setahun beroperasi, tiga blok itu mengalami kerosakan teruk pada bahagian dinding dan sehingga kini, blok B dan C sudah siap dibaiki manakala blok A masih dalam pembikinan. Sementara itu, Ketua Unit Siasatan SPRM negeri, Cheng Soon Heng berkata, unit tersebut mengalami kerosakan paling teruk berbanding pejabat kerajaan yang lain. "Unit ini menempatkan tujuh bilik dengan 10 kakitangan dan dianggarkan kerugian melebihi RM10,000. Barang yang rosak adalah peralatan pejabat dan beberapa barang SPRM.". Seorang lagi kakitangan di unit tersebut, Yusof Matusin berkata, dia terkejut apabila datang ke pejabat awal pagi tadi dan mendapati seluruh pejabat dilanda 'banjir'. "Saya percaya kebocoran ini sudah berlaku sejak malam tadi tetapi tidak disedari, kita masih lagi menjalankan kerja-kerja memunggah barang yang selamat ke tempat lain," katanya.

12 Jun 2009 (Jumaat)

Kerajaan akan mengambil lebih ramai kakitangan awam

PUTRAJAYA 12 Jun — Suruhanjaya Perkhidmatan Awam (SPA) giat berusaha memenuhi 50,000 kekosongan jawatan dalam perkhidmatan awam menjelang akhir tahun ini, kata Menteri di Jabatan Perdana Menteri Datuk T. Murugiah. Beliau berkata kekosongan itu termasuk 5,000 jawatan doktor, 5,000 jururawat, 300 jurutera, 800 Pegawai Tadbir dan Diplomatik (PTD) dan yang lain bagi pelbagai kategori pegawai biasa dan kakitangan sokongan. Kerajaan menggalakkan lebih ramai rakyat Malaysia melanjutkan pendidikan dalam bidang perubatan untuk membantu kerajaan mengatasi kekurangan doktor, katanya kepada Bernama di sini.

Beliau menambah bahawa lebih banyak biasiswa dan pinjaman diperoleh untuk rakyat Malaysia mengikuti kursus perubatan tempatan dan luar negara. Pada masa yang sama, katanya Kementerian Kesihatan mengkaji kemungkinan mengambil doktor asing untuk memenuhi kekosongan itu. – Bernama.

12 Jun 2009 (Jumaat)

Stadium Larkin tidak selamat?

Oleh HAMDAN TAWADI utusanjohor@utusan.com.my



KEBOCORAN bumbung dapat dilihat dengan jelas di kawasan tangga berdekatan pusat media yang meninggalkan kesan air hujan bercampur karat di Stadium Tan Sri Dato' Haji Hassan Yunos di Larkin, Johor Bahru, semalam

JOHOR BAHRU 12 Jun - Status tahap keselamatan terutamanya bahagian bumbung Stadium Tan Sri Dato' Haji Hassan Yunos di Larkin di sini turut dipersoalkan. Beberapa bahagian bumbung stadium itu didapati berlubang terutamanya di kawasan berhampiran ruang pusat media di stadium itu. Malah, keadaan yang sama juga dikesan di bahagian bumbung berdekatan pintu masuk stadium. Kesan kebocoran akibat hujan juga dapat dilihat dengan jelas pada struktur besi penyokong bumbung stadium yang berkarat, malah kesan aliran air bercampur karat ditemui di kawasan tangga. Bagaimanapun, Pengerusi Jawatankuasa Belia dan Sukan negeri, Md. Jais Sarday ketika dihubungi semalam memberitahu, stadium berusia lebih 20 tahun itu masih selamat digunakan orang ramai walaupun mengakui ia sudah lama tidak dibaik pulih.

Beliau berkata, JKR sedang melakukan pemeriksaan ke atas stadium itu untuk mengenal pasti bahagian yang perlu dibaik pulih atau diganti baru. "Keputusan pemeriksaan itu akan diketahui dalam tempoh antara satu hingga dua minggu lagi. "Namun, stadium masih selamat untuk dikunjungi orang ramai, hanya perlu dibaik pulih kerana ia sudah berusia lebih daripada 20 tahun.". Bagaimanapun, kenyataan itu berbeza dengan apa yang dinyatakan beliau pada pelancaran Pusat Satelit Institut Sukan Negara (ISN) di stadium tersebut pada akhir September tahun lalu yang turut dihadiri Menteri Belia dan Sukan ketika itu, Datuk Ismail Sabri Yaakob. Utusan Malaysia bertarikh 29 September tahun lalu melaporkan Md. Jais pada majlis itu berkata, beliau telah dimaklumkan oleh pihak JKR bahawa bumbung stadium itu tidak lagi selamat untuk digunakan.

Stadium itu yang mampu menampung kira-kira 25,000 penonton mula dibuka secara rasmi kepada orang ramai pada 1988 dan diuruskan oleh Perbadanan Stadium Johor. Seorang kakitangan Perbadanan Stadium Johor yang enggan dikenali berkata, kebocoran itu berkemungkinan berlaku kerana stadium itu masih menggunakan reka bentuk sistem saluran pengaliran air yang lama. Katanya, sebahagian air hujan akan memasuki saluran pengaliran sebelum ia dialirkan keluar dari bumbung. Jelasnya, saluran itu perlu diselenggara dan ditukar secara berkala bagi mengelakkan berlaku kebocoran.

Tambah beliau, kebanyakan stadium baru termasuk Stadium Hoki Taman Daya di sini tidak lagi menggunakan sistem itu, sebaliknya reka bentuk bumbung stadium yang dibina mampu mengalirkan air secara terus. "Walau apa pun punca kebocoran bumbung itu, ia

perlu dipandang serius bagi memastikan keselamatan orang ramai terjamin dan insiden bumbung Stadium Sultan Mizan Zainal Abidin di Terengganu yang runtuh pada 2 Jun lalu harus dijadikan pengajaran," ujar beliau.

Beliau berkata, stadium di Larkin itu adalah salah satu gelanggang dalam pertandingan Liga Perdana yang masih berlangsung dan pasukan Johor dijadualkan bertemu Kuala Lumpur Felda United pada 19 Jun ini di stadium tersebut.

13 Jun 2009 (Sabtu)

Pegawai Pertanian perlu buat susulan setiap projek

JITRA 13 Jun — Semua pegawai pertanian diingatkan supaya mengamalkan sikap proaktif dan membuat susulan terhadap sesuatu projek yang dilancarkan bagi memastikan ia berjaya. Timbalan Menteri Pertanian dan Industri Asas Tani Datuk Wira Mohd Johari Baharom berkata hasrat kerajaan untuk menjadikan sektor pertanian sebagai enjin ketiga terpenting penjana ekonomi negara tercapai.

"Saya kecewa dengan segelintir pegawai pertanian kerana gagal membuat susulan terhadap projek yang dilancarkan dan ada antara mereka tidak mengetahui langsung perkembangan atau memiliki data-data penting mengenainya," katanya kepada pemberita selepas merasmikan klinik Ujian Penilaian Sekolah Rendah (UPSR) bagi Dewan Undangan Negeri (DUN) Jitra di sini hari ini.

Beliau berkata sikap tidak ada susulan turut menjadi faktor kegagalan projek yang dilaksanakan. Katanya semua agensi di bawah kementeriannya akan diminta supaya saling bekerjasama dan membantu petani termasuk memasarkan produk Perusahaan Kecil dan Sederhana (PKS) mereka.

14 Jun 2009 (Ahad)

Kementerian kaji semula pemberian skim subsidi

LUMUT 14 Jun - Kementerian Pertanian dan Industri Asas Tani akan mengkaji semula semua skim subsidi termasuk pelbagai insentif yang diberikan kepada petani, penternak dan nelayan seluruh negara bagi memastikan mereka yang layak sahaja menerima bantuan tersebut. Menterinya, Datuk Noh Omar berkata, langkah berkenaan dapat menjimatkan perbelanjaan kerajaan setiap tahun dan mengelakkan daripada berlakunya pembaziran. "Kementerian menerima banyak aduan yang melaporkan pelbagai kes penyelewengan seperti penyalahgunaan skim subsidi minyak yang diberi kepada nelayan. "Tindakan

berkenaan merugikan wang rakyat kerana kerajaan terpaksa mengeluarkan kira-kira RM600 juta setahun bagi skim subsidi minyak berkenaan," katanya.

Beliau berkata demikian kepada pemberita selepas merasmikan Sesi Retreat Petunjuk Prestasi Utama (KPI) di Segari, dekat sini, kelmarin. Noh berkata, dalam kes pemberian subsidi minyak misalnya, ada kalangan nelayan dikesan mendapat kemudahan berkenaan sedangkan mereka tidak keluar pun untuk menangkap ikan di laut. Apa yang dikesalkan, katanya, ada nelayan yang langsung tidak bertanggungjawab dengan menjual semula minyak subsidi kepada orang lain.

"Tujuan kerajaan adalah untuk membantu mereka tetapi telah disalahgunakan sedangkan niat kita memberikan subsidi dan insentif adalah untuk dijadikan sebagai modal untuk memulakan perniagaan. "Subsidi dan bantuan itu sepatutnya membantu mereka untuk terus bertahan dan melebarkan lagi perniagaan yang mereka ceburi.". Antara subsidi dan insentif yang disediakan oleh kerajaan termasuklah Skim Subsidi Baja Padi Kerajaan Persekutuan, Subsidi Harga Padi, Subsidi Pengilang Beras, Subsidi Beras Sabah dan Sarawak, Skim Subsidi Diesel Nelayan dan Skim Subsidi Petrol Nelayan.

15 Jun 2009 (Isnin)

PKFZ: Usul Kit Siang ditolak

KUALA LUMPUR 15 Jun - Yang Dipertua Dewan Rakyat, Tan Sri Pandikar Amin Mulia menolak usul yang dibawa oleh Lim Kit Siang (DAP-Ipoh Timur) supaya ditubuhkan suruhanjaya diraja bagi menyiasat individu yang terbabit dalam penyelewengan Zon Bebas Pelabuhan Klang (PKFZ). Menurut beliau, walaupun isu berkenaan berkepentingan awam, ia bukan sesuatu yang perlu disegerakan. Katanya, kes itu kini disiasat Kementerian Pengangkutan yang sudah menubuhkan pasukan khas untuk memberi laporan dalam tempoh dua bulan. "Jawatankuasa Kira-Kira Wang Negara (PAC) dan Suruhanjaya Pencegahan Rasuah Malaysia (SPRM) juga sedang menyiasat perkara ini. Maka saya berpendapat ia tidak perlulah ia disegerakan," katanya pada sidang Dewan Rakyat di sini hari ini. Kit Siang yang juga Penasihat DAP ketika membentangkan usul itu berkata, hanya suruhanjaya diraja boleh memanggil pelbagai pihak bagi menyiasat peranan mereka dalam projek PKFZ. Syarikat juruaudit, PricewaterhouseCoopers Advisory Services Sdn. Bhd. (PwC) dalam laporan yang dikeluarkan pada 28 Mei lalu menyebut wujud kelemahan urus tadbir projek itu sehingga menyebabkan kosnya melambung kepada RM12.5 bilion.

17 Jun 2009 (Rabu)

Stadium siap tidak ikut spesifikasi?

IPOH 17 Jun - Apa sudah jadi?

Stadium mini Manjoi di sini yang siap tiga tahun lalu tidak dapat digunakan kerana dikatakan gagal mengikut spesifikasi ditetapkan oleh Persekutuan Bola Sepak Antarabangsa (FIFA). Datuk Bandar Ipoh, Datuk Roshidi Hashim berkata, padang bola sepak di stadium itu didapati tidak mengikut ukuran sebenar yang ditetapkan menyebabkan ia tidak boleh disewakan untuk sebarang perlawanan. Beliau berkata, sebagai jalan penyelesaian, Majlis Bandaraya Ipoh (MBI) mengambil keputusan membina dua gelanggang futsal dengan peruntukan kira-kira RM300,000 di stadium berkenaan. "Saya harap pembinaan gelanggang futsal dalam masa terdekat dapat 'menghidupkan' semula stadium mini Manjoi seluas 0.81 hektar itu daripada terus menjadi projek gajah putih," katanya.

Beliau berkata demikian selepas mengadakan mesyuarat membincangkan masalah berbangkit di Gugusan Manjoi di sini hari ini. Mesyuarat itu turut dihadiri Ahli Dewan Undangan Negeri (ADUN) Manjoi, Datuk Nadzri Ismail. Stadium mini Majoi dirasmikan oleh bekas Perdana Menteri, Tun Abdullah Ahmad Badawi pada 2007 tetapi tidak pernah digunakan untuk perlawanan bola sepak kecuali program ceramah parti pembangkang semasa Perak di bawah pentadbiran mereka. Lebih memburukkan keadaan, penduduk kawasan tersebut mendakwa stadium itu menjadi sarang maksiat golongan remaja.

Dalam pada itu, Roshidi mempelawa syarikat swasta yang berminat untuk membangunkan bekas lombong seluas 1.22 hektar yang terletak kira-kira 100 meter dari stadium mini berkenaan. "MBI berpendapat bekas lombong ini berpotensi untuk diperindahkan menjadi taman rekreasi mahupun kolam memancing. "Selain landskap sekelilingnya agak indah, lokasinya juga strategik kerana berhampiran Kompleks Gugusan Manjoi yang menjadi tumpuan masyarakat setempat," katanya.

18 Jun 2009 (Khamis)

Banteras pembalakan haram

Oleh MOHAMMAD YASIR JAAFAR utusanN9@utusan.com.my

SEREMBAN 18 Jun - Jabatan Perhutanan negeri akan mempertingkatkan operasi pemantauan dan penguatkuasaan di sekitar kawasan hutan simpanan kekal negeri ini dalam usaha membanteras kegiatan pembalakan haram di sini Pengarahnya, Roslan Ariffin berkata, usaha berkenaan adalah selari dengan tanggungjawab jabatan bagi memelihara khazanah hutan simpanan kekal negeri ini seluas 154,185 hektar. "Operasi ini akan melibatkan unit penguatkuasaan yang dianggotai oleh pegawai perhutanan dan renjer di setiap daerah masing-masing serta kerjasama dari pihak polis. "Kekerapan operasi akan ditingkatkan dari semasa ke semasa dan pemantauan akan dilakukan pada masa tertentu

yang telah dikenalpasti sebagai waktu kemuncak aktiviti haram ini dijalankan," kata beliau kepada *Utusan Malaysia* di sini hari ini.

Ini berikutan kejayaan pihak Jabatan Perhutanan bersama polis menumpaskan satu kegiatan pencerobohan hutan dan pembalakan haram di Hutan Simpan Pasoh, Lui Muda, Jempol dekat sini baru-baru ini yang menjurus kepada penahanan enam pembalak haram pada 15 Jun lalu. Jelas Roslan, pada kebiasaanya, aktiviti pembalakan haram akan dijalankan bermula waktu petang sehingga ke awal pagi kerana takut perbuatan mereka dihidu. "Maka, saya memohon kerjasama daripada orang ramai agar dapat melaporkan serta memberikan maklumat kepada kami sekiranya mendapati ada lori-lori keluar masuk dari kawasan hutan dalam keadaan mencurigakan pada waktu malam atau awal pagi. "Hasil daripada maklumat awam yang diterima, pihak kami akan menjalankan siasatan dan sekiranya didapati aktiviti pengambilan balak secara haram dilakukan. Unit penguatkuasaan kami tidak akan teragak-agak untuk melakukan serbuan dan tangkapan," tegas beliau.

Ketika diminta mengulas mengenai perkembangan kes pembalakan haram yang berlaku baru-baru ini itu, Roslan memberitahu, kes tersebut masih disiasat oleh pegawai penyiasat yang dilantik jabatan. "Pihak kami masih menjalankan siasatan berhubung kes tersebut dan sekiranya didapati bersalah mereka akan dihadapkan ke mahkamah bagi dikenakan hukuman," ujar beliau.

Tambah beliau, mereka yang didapati menjalankan aktiviti pencerobohan dan pembalakan haram boleh didakwa di bawah Seksyen 15 Akta Perhutanan Negara 1984 pindaan 1993."Kalau didapati bersalah mereka boleh dikenakan hukuman denda RM500,000 dan penjara tidak kurang setahun tetapi tidak melebihi 20 tahun," kata Roslan.

18 Jun 2009 (Khamis)

Rencana - Memaksimum kesan pakej rangsangan

Oleh SOBRI SUDIN

Pakej rangsangan ekonomi pertama bernilai RM7 bilion, dan yang kedua bernilai RM60 bilion dilihat telah dilaksanakan sebaik mungkin. Impak projek bernilai tinggi yang ada kesan langsung ke atas rakyat seperti Program Penyenggaraan Awam (PIA) dan Projek Infrastruktur Asas dilihat diberi keutamaan dengan pelaksanaannya dipantau teliti oleh Unit Penyelarasian Pelaksanaan (ICU), Jabatan Perdana Menteri. Usaha dan langkah praktikal ini cukup bermanfaat khususnya kepada segmen komuniti di kawasan luar bandar. Tampak jelas, berasaskan pengalaman negara menghadapi situasi kegawatan ekonomi yang berlaku dalam banyak fasa, misalnya era awal 1980-an, krisis kewangan 1997 dan kini kelembapan ekonomi global, pengurusan negara mampu bertindak secara cepat, pantas, fleksibel dengan penekanan kepada langkah dasar fiskal dan bukan fiskal.

Pimpinan negara tidaklah hanya pandai berceramah, memeras audien yang mendengar ceramah dengan mengutip dana wang jihad kononnya, diikuti menggunakan serta manipulasi ayat-ayat bertopengkan agama untuk memujuk rakyat. Akan tetapi berusaha, berikhtiar, akhirnya berdoa dan bertawakal kepada Allah SWT sesuai dengan prinsip ajaran Islam, yang menggalakkan umatnya berusaha, menggunakan potensi akal, bukannya menyalahkan orang lain bagi sebarang kelemahan atau menjaja seribu satu macam alasan.

Walhal sebenarnya tidak berupaya mentadbir atau mengurus ekonomi rakyat seperti mana yang diterjemahkan oleh kerajaan pakatan pembangkang di beberapa buah negeri. Dalam konteks pengurusan krisis ekonomi negara, juga didapati trend memperlihatkan sektor awam akan sentiasa diberi peranan besar, selain kerajaan sedaya upaya menambah peruntukan perbelanjaan sedia ada untuk mewujudkan kesan ekonomi gandaan. Ini sering kali merujuk kepada konsep, lebih banyak kerajaan berbelanja, lebih banyak kitaran wang dalam pasaran akan bertukar tangan. Namun begitu, akibat adanya segelintir pegawai atau agensi pelaksana yang kurang berkesan dan kurang menghayati konsep amanah maka berlakulah ketirisan, kebocoran, sehingga peruntukan berkenaan tidak sampai secara terus kepada rakyat sebagai pengguna dan penerima.

Lantas itulah, pendekatan stereotaip misalnya memperbanyakkan projek kemudahan awam dengan tujuan memberi agihan kerja kepada kontraktor kelas F sebagai sebahagian daripada strategi menghadapi krisis ekonomi dirasakan perlu diubah kepada hala cara yang lebih betul dan tepat. Ini berkait rapat dengan tiga keadaan utama. Pertama kesan kemelesetan ekonomi kali ini melibatkan kehilangan sumber pendapatan apabila ramai pekerja khususnya di sektor industri dibuang. Kesan penguncutan permintaan barang eksport dari pasaran utama negara.

Kedua, kesan kemelesetan ekonomi kali ini selain pengaruh faktor luaran, turut dipengaruhi oleh faktor dalaman. Misalnya pengurangan perbelanjaan pengguna, akibat kenaikan kos harga barang dan perkhidmatan, selain pengguna lebih berhati-hati dalam perbelanjaan harian mereka menyebabkan perniagaan kecil dan sederhana menerima tempiasnya.

Ketiga, kaitan dua angkubah tersebut turut menyebabkan timbulnya dua kesan gandaan lain yakni peningkatan kadar jenayah kecil, jenayah juvana dan kebejatan sosial yang pastinya akan menjelaskan usaha pembangunan aset sumber modal insan negara sebagai penerus ketamadunan negara di masa hadapan.

Apa yang paling dibimbangi, kesemua pengaruh faktor dan kesan ini akan menimbulkan satu persepsi bahawa "kerajaan yang memerintah bersalah dan harus bertanggungjawab di atas kesemua keadaan ini, selain jarum beracun mainan pembangkang akan terus dikumandangkan untuk meningkatkan tahap kebencian rakyat kepada pemerintah." Walhal banyak keadaan yang berlaku adalah di luar kawalan kerajaan sendiri. Selain kerajaan sendiri tidaklah mempunyai lampu ajaib Aladdin yang boleh digosok sepanjang masa untuk memuaskan hati semua kehendak rakyat. Justeru, bagi merungkai dilema dan persoalan ini diketengahkan beberapa pelan taktikal yang mujarab lagi boleh dilaksanakan secara cepat.

Pertamanya melencangkan apa jua usaha atau strategi pakej rangsangan ekonomi negara agar diubah pendekatannya. Ini boleh dijayakan misalnya melalui orientasi perbelanjaan dan bajet yang menekankan kepentingan bantuan disalurkan sampai terus ke tangan penerimanya tanpa melalui pihak kedua, ketiga ataupun dalam bentuk projek kemudahan asas. Rakyat sebenarnya yang terbeban dengan kesan kemelesetan ekonomi kali ini lebih mengharapkan pemberian 'nilai wang tunai', diskau harga, kupon tunai, subsidi dan elaun khas kecemasan. Sektor swasta juga harus turut terlibat secara lebih aktif dalam strategi dan orientasi perbelanjaan dan bajet pengurusan keuntungan mereka. Ini boleh dimulakan dengan diberi keutamaan kepada para pekerja mereka sendiri yang selama ini telah bekerja keras memajukan organisasi. Bukannya ibarat 'habis madu sebah dibuang'.

Pelbagai insentif seperti skim, baucar, kupon diskau, tunai dan subsidi dapat dialirkan semula kepada pekerja mereka juga timbulnya sifat ihsan dan amanah tulen dalam menghargai jasa pekerja mereka selama ini. Sektor swasta dan industri sudah sekian lama diberikan pelbagai insentif, galakan dalam pelbagai bentuk, geran pinjaman, modal teroka, insentif cukai dan bukan cukai oleh pihak kerajaan. Namun timbul persoalan bagaimana kesemua insentif dan galakkan berkenaan turut sama dapat dikongsi oleh para pekerja yang menyumbang tenaga kepada kejayaan organisasi mereka selama ini?

Apakah dikongsi atau hanya dinikmati secara kendiri oleh pengusaha industri? Impaknya kerajaan yang bersusah payah menyediakan pelbagai galakan dan skim subsidi kepada industri akhirnya disalahkan apabila industri berkenaan gagal menyediakan kos barang dan perkhidmatan keluaran mereka pada kadar harga yang murah. Sebaliknya mahal atas alasan untuk menampung kos. Apakah mereka bercakap benar selama ini dengan menjadikan kerajaan yang banyak memberi subsidi kepada mereka sebagai kambing hitam?

Kerajaan dengan kebijaksanaan pengurusan ekonominya yang telah terbukti dari pengalaman lalu boleh juga mengatasi kelembapan ekonomi semasa dengan meminimumkan apa jua caj atau kos perkhidmatan sama ada yang disediakan secara langsung olehnya atau melalui regulasi semula ke atas perkhidmatan yang disediakan melalui konsep penswastaan. Ini meliputi perkhidmatan pengangkutan, rangkaian sistem perhubungan, telekomunikasi, utiliti, pembentungan dan lain-lain. Ini adalah kerana ekonomi yang dinamik khususnya dalam sosiobudaya rakyat Malaysia adalah persekitaran ekonomi kondusif yang mampu memperlihatkan kesannya secara segera, diterjemah dalam bentuk tindakan bukan sekadar pengumuman angka, dilihat dengan nyata aspek pelaksanaannya oleh rakyat, diagih dan tempias kemakmuran dan kesan gandaannya dinikmati secara merata bukan secara terpilih semata-mata. Dalam konteks mengisi aspirasi rakyat yang mahu melihat kesan segera, agar bebanan, kos sara hidup, caj perkhidmatan dan pendapatan nilai wang benar mereka dapat dinikmati semaksimum mungkin maka dicadangkan beberapa langkah berikut:

- a) Mewujudkan kembali dengan kadar segera waran pendahuluan bagi pelajar yang mendapat tawaran kemasukan ke IPTA, IPTS dan semua pusat pengajian tinggi dalam negara yang bakal bermula awal Julai nanti. Waran yang boleh ditunaikan di pejabat pos ini atau dikreditkan terus ke akaun mereka, melalui carian alamat dan nombor akaun mereka.

Langkah ini mampu mengurangkan tanggungan dan bebanan ibu bapa dan pelajar berkenaan bagi urusan persediaan kemasukan dan pendaftaran. Janganlah kerana kemiskinan, kurang kemampuan kewangan membantutkan hasrat rakyat untuk mendapatkan ilmu di menara gading.

Janganlah lagi kedengaran rungutan daripada Menteri bahawa biaya untuk kos pendidikan dan bantuan pinjaman pendidikan kian tinggi, kerana ini adalah pelaburan jangka masa panjang jika kita berhasrat mahu mempunyai aset modal insan yang berpendidikan dan berpengetahuan demi kemajuan ketamadunan.

b) Memberi kupon diskau kepada isi rumah atau keluarga di kawasan bandar, bandar raya dan pinggir bandar yang pendapatan suami isteri RM3,000 ke bawah dan mempunyai tiga orang anak atau lebih. Kupon diskau ini membolehkan isi rumah berkenaan membeli barang keperluan asas seperti gula, beras, tepung, roti, minyak masak, dan bayaran perkhidmatan pada kadar harga asas.

Kupon diskau ini juga membolehkan isi rumah berkenaan mendapatkan kos minimum bagi rawatan di hospital swasta, bagi tujuan menggunakan kemudahan pengangkutan awam dan perkhidmatan lainnya. Natijah positif daripada usaha ini, pendapatan wang benar yang diterima isi rumah dalam bentuk gaji bulanan akan bertambah dan mampu dimanfaatkan sebaik-baik mungkin misalnya untuk tabungan, selain perbelanjaan sara hidup mereka dengan sendirinya akan berkurang.

Pada akhirnya, sudah tentulah kesejahteraan institusi keluarga dapat dibentuk. Ini memandangkan institusi keluarga yang tidak dibebani atau dihantui oleh perbelanjaan sara hidup yang meningkat setiap bulan, dengan sendirinya dapat menghindarkan ketua isi rumah sebagai contoh terlibat dalam perlakuan rasuah.

c) Mempergiatkan dan mempercepatkan dengan kadar pantas pembinaan apartmen kos rendah, flat Projek Perumahan Rakyat Termiskin (PPRT), lot dan ruang niaga, premis gerai bagi penduduk setinggan dan peneroka bandar, golongan miskin bandar, dengan menggunakan teknologi dan sistem binaan IBS.

Apartmen, flat PPRT tiga bilik ini boleh diupayakan peranannya oleh Syarikat Perumahan Negara Berhad (SPNB) dan UDA Holdings yang kemudiannya boleh disewa beli kepada penduduk bandar miskin atau berpendapatan rendah. Sekali gus isu setinggan bandar, pencerobohan tanah kerajaan, kontroversi antara penduduk setinggan dan pemaju serta hasrat kerajaan untuk menjayakan satu keluarga satu rumah akan tercapai.

Dasar sebelumnya yang lebih berorientasikan pembinaan kondominium mewah dan sederhana atas hasrat dan strategi keuntungan komersial semata-mata haruslah dikurangkan. Tanah-tanah milik kerajaan sedia ada perlulah direncanakan strateginya ke arah ini. Langkah ini boleh memperbetulkan strategi kependudukan yang dilihat tidak seimbang selama ini. Kesan kurangnya pembinaan apartmen kos rendah menyebabkan komposisi Melayu dalam bandar atau bandar raya kian terpinggir, dan kawasan tumpuan ini hanya dimonopoli oleh kaum etnik tertentu sahaja. Dari aspek integrasi, usaha

perpaduan dan pencapaian hasrat Satu Malaysia tentulah akan menghadapi dilema jika dasar kependudukan ini tidak segera dibetulkan.

Jika langkah-langkah praktikal ini boleh diupayakan segera, dijayakan secara tuntas lagi ikhlas, maka kesan maksimum daripada pakej rangsangan ekonomi mampu menjadi ramuan mujarab secara jangka pendek mahupun jangka panjang bagi membantu meringankan bebanan ditanggung rakyat. Selain itu memperlihatkan imej kerajaan yang bersungguh, praktikal dan teliti dalam memastikan apa jua agihan, perbelanjaan ekonomi negara dapat sampai terus kepada golongan sasar.

PENULIS ialah Felo Unit Ekonomi dan Politik, Yayasan Sumber Maklumat

18 Jun 2009 (Khamis)

Hentikan sistem dua bil pembentungan

PETALING JAYA 18 Jun — Persatuan Pengguna Air dan Tenaga Malaysia (WECAM) hari ini meminta kerajaan menghentikan sistem dua bil pembetungan dengan kadar rata RM8 setiap sebulan kerana ia tidak adil kepada pengguna. Sebaliknya, persatuan itu mahu bil pembetungan itu digabungkan dengan bil air berasaskan kepada penggunaan air yang diukur menerusi meter. Setiausaha Agung (WECAM), S. Piarapakaran berkata, majoriti kediaman menggunakan kurang daripada RM8 bil air untuk simbahana tandas serta basuhan, dan oleh itu adalah tidak adil untuk mengenakan kadar bayaran secara kadar rata. "Maka sistem bil berasingan bagi air dan pembetungan pada masa ini perlu dikaji semula," katanya.

Beliau berkata, sistem bil penggabungan akan lebih adil kerana pengguna hanya akan membayar berdasarkan kepada penggunaan mereka. - Bernama